

† ԳԵՈՐԳ ԵԻԱՆԳՈՒԼ ԵԱՆ

Սեպտեմբերի 16-ին, երեկոյան, Հերակլի բաղանիքում, յանկարծակի վախճանուեց Թիֆլիսի քաղաքագլուխ Գէորգ Եւանգուլեանը, 57 տարեկան հասակում:

Հանգուցեալը Թիֆլիսեցի էր: Նա իր միջին կրթութիւնը աւարտել էր Թիֆլիսի նահանգական գիմնազիայում, իսկ բարձր կրթութիւնը Պետերբուրգի համալսարանի իրաւաբանական բաժնում: Վերադառնալով հայրենիք նա հէնց առաջին տարիներից սկսած (1867 թուից) վարում էր պետական զանազան պաշտօններ, մասնակցելով մինեոյն ժամանակ հասարակական և ազգային գործերում: 1883 թուականից Գ. Եւանգուլեանը թողնում է պետական ծառայութիւնը և մտնում երգուեսալ հաստարմատարների դասակարգի մէջ: Իբրև փաստաբան հանգուցեալը բաւական հոշակ ունէր: 1897 թուին Գ. Եւանգուլեանը ընտրուեց Թիֆլիսի քաղաքագլուխ: Թէ իբրև պետական պաշտօնեայ, թէ իբրև փաստաբան, քաղաքային իրաւասու, Ներսիսեան և Գայիանեան դպրոցների հոգաբարձու, Թիֆլիսի Փոխադարձ Վարկի Ընկերութեան խորհրդի նախագահ և թէ իբրև քաղաքագլուխ՝ Եւանգուլեանը ցոյց տուեց սովորական մարդկանց ընդունակութիւններից բարձր ընդունակութիւն և համոզմունքի ու կամքի հաստատութիւն: Գ. Եւանգուլեանը Թիֆլիսի ինտելիգենցիայի նշանաւոր դէմքերից էր:

Հանգուցեալը իր ազգային-կրօնական հայեացքներով պատկանում էր մեր այն կուսակցութեան, որ յայտնի էր մեղուական անունով: Եւանգուլեանը այդ կուսակցութեան ամենաազդեցիկ և տաղանդաւոր պարագլուխներից մէկն էր: Մեր մամուլի մէջ նա իր հայեացքները պաշտպանում էր «Մեղու» և «Արձագանք» թերթերում և յամենայն դէպս մեր իսկական և կրթուած պահպանողականներից էր: